



## 記持

你的第一个記持是啥物？阮大漢查某囡兩歲開始有記持，是細漢佇臺南予阮姊仔弄，佇塗跤耍地磚安無好發出來的烏點。細漢查某囡講，伊是三歲讀幼兒園的時，老師牽伊的手，共食袂了的飯送去予大班的囡仔食。彼當陣伊感覺盤山過嶺，這馬知影干焦幹一條巷仔爾。個兩個是好命底，第一个記持攏是有人惜、有人陪、有人疼。

阮翁有印象的，是伊五歲手骨斷去，個阿母揸兩罐米酒，共伊偕去庄仔頭予一个王祿仔仙撫。米酒毋但是庄跤人的禮數，嘛是揸去欲做麻藥，含佇喙裡，噴蹠脫輪的所在。結果王祿仔仙變酒仙，伊共規罐酒淋甲欲焦矣，上尾仔喙才清彩噴一下。了兩罐酒，手骨嘛撫無正。到高中因為歹看，才去大病院開刀鞏(khōng)石膏，挽回少年人的信心。手骨斷去的記持，予伊想著阿母的愛，一世人毋敢烏白來。

我初擺的記持，是四歲跤底予破斫仔鑿著。細漢蹠佇高雄苓仔寮油桶遐，有一工下晡，日頭猶光咧，草埔仔的菅芒綴高雄港吹來的海風搖啊搖。我褪赤跤佇門口耍，看大姊欲出去揣同學，嘛想欲綴。大姊擲一句：「莫綴喔！」就走矣。我看伊愈行愈遠，躊躇一下，毋知佢位借來的膽，就從去欲揣伊。我綴後壁逐，才逐到第一粒草埔仔爾，就踏著尖尖的物件。鑿一下，血用噴的，心內足驚惶，想講四界無人足欲按怎？跤底足痛，就用跤後蹬行，那吼那跛轉去厝。記持若像停佇阿公緊張，共我止血、糊藥仔。門口亂操操，姊仔轉來予人(hóng)罵甲臭頭……。可能因為這個記持，予我的個性變甲做代誌足細膩。

我聽過別人有悲慘的記持，講伊三歲和小妹擲樹仔枝去耍水池仔的魚，因為越頭看無小妹就家己轉去。後來個阿母哭甲叫天叫地，伊予個大姊搨喙賴，講小妹是伊害死的。自按呢，伊一世人虧欠，一世人和厝裡袂對同。

頭一个記持，若像有特別的影嚮恰意義。一拎(gīm)著這枝思考的鎖匙，一世人就開始順這個記持過日子。若是歡喜的，日後會較幸福過日；若淡薄仔痛苦的，會體會甜蜜、學著教示；若是天意造成無奈，敢是愛學會曉行出過去、原諒家己？

作者：王秀容

### ☆詞彙學習☆

【記持】kì-tī：記憶。

【脫輪】thùt-lûn：脫臼。

【地磚】tê-tsng：地板瓷磚。

【鞏】khōng：以水泥或磚頭砌磚、牆等。

【好命底】hó-miā-té：天生好命。

【跤後蹬】kha-āu-tenn：腳跟、腳後跟。

【王祿仔仙】ông-lòk-á-sian：江湖郎中。【袂對同】bê-tuì-tâng：不合。